

非別里分疆劃其故宇終爲負固宜令江北一帶西自碧灘東連林崗背南度蓼水墾作便田江南一帶東起蒲竹西遶河源亦托處平原遠背山麓但此等新民方就繩檢如放豚憚於胥絡野鹿駭於牢籠故假借過寬則獷越之性仍在約束太驟則簡野之俗弗堪按之故牘曾有准入狼家或附編民戶者意非不美也但入狼則土蠻蠶食編民則廂里漁侵皆非善政宜倣古人保甲法度十家爲甲甲有總五家爲保保有長各就族類擇稍有恒業能通漢音者爲之仍先計口科糧大約十取其一歲令保長徵催別貯一倉以便會稽授廩之

初量給種子五年之後稍派徭差近郊之地各立墟市招致諸徭賈易貨物一月二舉委官董治使無貪攘

二曰立營堡以通江道藤峽上抵柳慶下委潯梧諸郡咽喉也曩者江介諸徭憑據地利厚其徒黨裒兇鞠頑今羣兇已剪殘黨歸降威振法行宜與更始但弩灘浪灘兩處徭人旣徙平地則遼曠舊穴恐有客賊乘之而賓旅往來不爲哨護或有萬一之警兩處灘碕宜各立營堡戍以官兵置籍分符嚴律明紀使部伍聯屬彼此應援游艘往來且防且守近堡之地量遷同化良徭環居內外易田